

Mistral Theofil Schmid, Sedrun

da mistral Faustin Carigiet
CR 1991, pag 404



Theofil Schmid ei naschius ils 16 d'october 1912 a Sedrun. Sco fegl vegl d'ina numerusa famiglia da 12 affons ha el frequentau leu la scola primara e secundara. El empren latin tier sur Fetz, sescolescha vinavon ella scola claustral a Mustér ed acquista 1933 el collegi a Sviz il diplom mercantil. Mo el temps da crisa e disoccupaziun era ei buca lev d'anflar laver cuntenteivla. El sedecida 1937 per ina midada professiunala e banduna 1939, igl onn dall'entschatta dalla secunda uiara mondiala, il seminari cantunal a Cuera cun la patenta en sac. 1944 meina el la giuvna Marta Valier agl altar ed ord lur ventireivla letg sorteschan 5 affons: 3 buobs e 2 buobas, oz tutz sur sesez.

En survetsch alla publicitat

Dond in sguard anavos el passau dil car defunct, savein nus mo retener fragments da tut sia laver prestada. La liunga gliesta d'uffecis, d'activitads e da survetschs prestai al concarstgaun ed alla publicitat dattan perdetga d'in fritgeivel operar en uniuns, pleiv, vischnaunca, cumin e Cantun.

En vischnaunca

La gronda laver ed igl engaschi da president Theofil Schmid per la vischnaunca da Tujetsch meretan da vegin menziunai. Cun 51 onn daventa il trapassau president communal dalla gronda vischnaunca da Tujetsch ch'era en cumplein svilup turistic ed economic. Sut siu tgamun vegin impurtonts projects realisai: Las plontazius e lavineras a Scharinas e Niriel, la cumpra ed eresciun dalla casa da vegls s. Vigeli a Sedrun, la surprindida dall'Ovra electrica entras la vischnaunca, la decisio concernent l'arrundaziun e la meglieraziun, la planisaziun zonala, il francar ils necessaris credits per l'eresciun dalla halla da bogn, per menziunar mo las pli impurtontas decisiuns. Bein in'activitat stentusa che pretenda in inschign special ed ina perseveronza endinada.

La vischnaunca da Tujetsch renconuscha quei grond engaschi cun eleger Theofil Schmid 1973/74 sco emprem president dil niev Cussegli da vischnaunca.

En pleiv

Sco president dalla pleiv da Tujetsch stat mistral Schmid era buca lischents: La pleiv survegn ina nova constituziun. Per il Cussegli pastoral veginan ils statuts elaborai e la baselgia parochiala a Sedrun e duas capluttas - quella da s.Brida e s.Bistgaun - veginan restauradas.

El Cussegli grond

Igl onn 1965 elegia il pievel dil cumin dalla Cadi president communal Theofil Schmid el Cussegli grond, al qual el appartegn 16 onns. Beingleiti acquista el la stema dil parlament cantunal che confida ad el il presidi da differentas cumissiuns. Cun ina detschartad marvegliusa e cun grond success representa el a Cuera ils interess da nies Cumin. Gia igl emprem onn fa el al plenum l'emprema damonda per la slargaziun dil stradun Mustér-Sedrun. 1968 suonda la secunda damonda per il tschancun Sedrun-S. Brida, 1969 ina tiarza en caussa. Finalmein accepta il parlament cantunal 1971 unanimamein siu postulat pertuccint il stradun Mustér-S.Brida.

Cun la medema vigur renda deputau Schmid attents il Cussegli grond sin la viafier dalla Furca-Alpsu. Da quei dattan sia interpellaziun partenent la megliur tecnica, lu siu perschudent referat concernent la concessiun da credits per la viafier Furca-Alpsu, perdetga. - Pil schurmetg dalla via dil Lucmagn tschenta el 1967 ina damonda alla Regenza concernent l'eresciun da gallarias e lavineras.

Al cumin

Igl ei buca da smarvegiliar ch'ils votants dalla Cadi surdattan igl onn 1971 a deputau Schmid il desiderau uffeci da mistralia. 4 onns empeila el il Cumin cun distincziun. Sco derschader singul relai el en quei interval numerus mandats penals, tractescha - ensemens cun la Dertgira - ulteriurs cass e prepara ina summuna da disposiziuns sil sectur civil. Sia gestadad sco derschader ei mai stada en dubi. Duront sia perioda d'uffeci ha il suveran dalla Cadi demussau en la votaziun dils 3 da decembre 1972

eclatantamein ch'el vegli mantener vinavon la tschentada da cumin. Quella decisiun perschuentada ei d'attribuir per gronda part a mistral Schmid, che ha - encunter gronda opposiziun - defendiu la tschentada anoviars cun ruasseivladad, bia prudentscha e capientscha.

Savend ch'in precis concept dall'organisaziun circuitala e dallas cumpetenzas e duers dils organs e dallas autoritads seigien l'emprema premissa per in fritgeivel e cuntuau agir communabel eifer il cumin, lai mistral Schmid - cun consentiment dalla Dertgira - elaborar ina constituziun per il cumin dalla Cadi. Quella cumpeglia tuttas determinaziuns per fatschentas da natira politica, administrativa e giudiziala. La presentaziun al suveran da quella ovra d'imporzonza vitala ei fetg hanada e delicata. Mistral Schmid posseda denton ils duns e la confidanza indispensabla, aschia che vontantas e votants approbeschan ils 14 d'october 1973 cun in resultat excellent il sboz per l'emprema constituziun circuitala. Differents cumins, che han ils davos onns francau lur dretgs e duers, han applicau sco model la fuorma da nies cumin.

Medemamein sebasa la creaziun dall'ugadia ufficiala Surselva sin l'iniziativa da mistral Schmid. El ha renconuschiu la necessitat da quell'instituziun, che survescha a quels concarstgauns che han il pli da basegns digl agid.

La clamada

23 onns da si'activitat dedichescha scolast Theofil Schmid alla scolaziun dils affons da sia vischnaunca - igl emprem a Cavorgia e lu a Sedrun. El medem temps s'engascha el era cun anim per las uniuns culturalas. Buca meins che 37 onns eis el commember activ dil chor-baselgia da Sedrun. La musica instrumentalha ha el diregiu da 1939 entochen 1963. - Allas damondas sil sectur da scolaziun renda mistral Schmid vinavon si'attenziun. Aschia appartegn el da 1968 entochen 1978 all'impurtonta cumissiun cantunala d'educaziun. - La fascinaziun da Theofil Schmid per l'economia e siu svilup - oravontut per quellas en sia zun carezada Val Tujetsch - ha segiramein pegliau ragisch en la buna scolaziun mercantila, che Theofil Schmid haveva contonschiu cun il diplom.

Perquei s'engascha el cun gronda savida e bien success per in sanadeivel svilup economic e turistic dalla Val. Duront $\frac{1}{4}$ tschentaner fa el part dil cussegli d'administraziun dalla Cassa Raiffeisen, Sedrun, ei president dalla centrala da latg, dalla corporaziun digl acquaduct Sedrun e cassier dall'unio da cura e traffic, ei president dil club da skiunzs, cassier e president dalla societad da runals, Tujetsch.

El daventa commember dall'impurtonta cumissiun per las contractivas cun la NOK concernent la concessiun dallas auas, fa part dalla cumissiun da spital el temps dallas preparativas per l'erecziun d'in spital regiunal a Glion ed ei suprastont dalla Pro Surselva.

Tut incaricas e scharschas che vegnan remuneradas sil pli cun in Dieuspaghi. Il da viver - sco nus schein - gudogna il trapassau, suenter ch'el ha calau da dar scola, sco meinafatschenta dall'interpresa Murer SA a Sedrun. Sin quei camp da lavur essan nus s'entupai gia all'entschatta dils onns 60. El cuntuau contact amicabel hai jeu empriu d'enconuscher Theofil Schmid leu, gest aschi bein sco en la politica. Per mei daventa igl um gest, conciliant ed amicabel igl exempl.

E co vess ei saviu esser auter tier mistral Theofil Schmid! Sco um cartent e fideivels all'ierta dils babuns eis el era s'engaschaus en la partida cristiandemocratica ed ha defendiu cun lezza ils dretgs humans, ton per giuven e vegl sco per um e dunna.

Tons e tons expriman a mistral Theofil Schmid in engraziament resentiu per si'activitat admirabla. Da quei dattan las numerosas visetas da condolentscha perdetga aschibein sco la participaziun dallas delegaziuns da tuttas uniuns, dalla pleiv e vischnaunca, dil cumin e cantun e d'in pievelun en malencurada, alla sepultura.

Theofil, rauassa en pasch!